

Tillaga rektors og forseta fræðasviða að endurskoðuðu matskerfi fyrir Háskóla Íslands

Fyrir háskólaráðsfund 5. nóvember 2009

Aðdragandi

Í *Stefnu Háskóla Íslands 2006-2011* er að finna ýmis tilmæli um endurbætur á matskerfi Háskólans í þágu þeirra meginmarkmiða sem stefnan felur í sér. Allt frá árinu 2006 hefur verið unnið að viðtækri endurskoðun kerfisins, fyrst á vettvangi vísindanefndar háskólaráðs en frá því á sl. vormisseri hafa forsetar fræðasviða Háskólans ásamt rektor leitt endurskoðunarferlið. Meginmarkmið endurskoðunar matskerfisins er að laga það að stefnu Háskólans, en um leið er lögð rík áhersla á að breytingarnar feli í sér skilgreiningu á því sem best er gert á hverju fræðasviði og að gagnsæi kerfisins verði sem mest.

Í aðdraganda háskólaþings sem haldið var 15. maí sl. fól rektor forsetum fræðasviða ásamt fulltrúum í sameiginlegri stjórnýslu að endurskoða tillögur vísindanefndar í ljósi umsagna fræðasviða, deilda og kjarafélaga og að undirbúa umræður á háskólaþinginu. Að lokinni ítarlegri umræðu á þinginu var samþykkt að:

„Á vegum rektors og forseta fræðasviða verði áfram haldið endurskoðun matskerfis rannsókna við Háskóla Íslands á grundvelli þeirra hugmynda sem kynntar voru í framlagðri *Greinargerð um framkomnar athugasemdir um endurskoðun matskerfis við Háskóla Íslands og viðbrögð við þeim* og með hliðsjón af þeim sjónarmiðum sem fram komu á háskólaþingi 15. maí 2009. Stefnt er að því að endurskoðað matskerfi taki gildi 1. janúar 2010 og komi til fullrar framkvæmdar árið 2011.“

Í kjölfar háskólaþingsins hefur verið unnið nær sleitulaust að endurskoðun matsreglnanna. Fyrir liggur sameiginleg tillaga forseta fræðasviða og rektors þar sem tekið hefur verið tillit til athugasemda við tillögur vísindanefndar. Viðamiklar athugasemdir bárust frá öllum fræðasviðum Háskólans, kjarafélögum kennara og frá Háskólanum á Akureyri. Við endurskoðun reglnanna var lögð rík áhersla á tvö meginatriði; í fyrsta lagi að umbuna betur fyrir það sem best er gert á hverju fræðasviði en raunin hefur verið til þessa og í öðru lagi að bæta mat á svokölluðu fjölhöfundafni, þ.e. á ritverkum með tvo eða fleiri höfunda. Það er mat forseta fræðasviða að tillagan nái vel þessum meginmarkmiðum. Lykillinn að þeim árangri er notkun alþjóðlegs flokkunarkerfis fyrir tímarit þeirra fræðasviða sem hingað til hafa ekki birt mikið í svokölluðum ISI-tímaritum. Enn fremur hafa ýmis önnur ákvæði reglnanna komið til skoðunar, svo sem aðlögun þeirra að nýju skipulagi Háskóla Íslands, einkum sameiningu hans og Kennaraháskóla Íslands, og þá hafa ýmis lykilhugtök verið skilgreind með nákvæmari hætti en áður. Margvísleg önnur nýmæli má finna í tillögunni, svo sem í tengslum við mat á efni sem lagt er fram á ráðstefnum og birt í ráðstefnuritum, mat á ritstjórn, ritdómum og þýðingum er endurskoðað umtalsvert, nýsköpun og yfirfærslu þekkingar eru gerð mun ítarlegri skil en áður og til að hvetja enn frekar til öflunar rannsóknastyrkja utan Háskólans er lagt til að veitt verði stig fyrir öflun þeirra. Nánari grein er gerð fyrir þeim breytingum sem tillagan felur í sér í kjölfar hvers undirkafla.

Framangreindar umsagnir fræðasviða og annarra aðila bera þess glöggt vitni hve flókið verkefni það er að endurskoða reglur sem lagðar eru til grundvallar við mat á störfum háskólafélks. Háskóli Íslands sinnir rannsóknum og kennslu á fjölbreyttum fræðasviðum og hefur ríkar skyldur við íslenskt samfélag. Matskerfi Háskóla Íslands hefur um árabil haft afar

jákvæð áhrif á árangur og virkni í rannsóknum og öðrum störfum háskólafélks. Óhætt er að fullyrða að samstaða ríki um nauðsyn þess að hafa matskerfi af þessu tagi en jafn ljóst er að seint verða allir á eitt sáttir um einstaka þætti þess. Því er mikilvægt að matskerfið sé í sífelldri endurskoðun.

Matskerfi Háskóla Íslands

Forsendur

Matskerfi Háskóla Íslands er grundvöllur mats á störfum akademískra starfsmanna, þ.e. þeirra sem ráðnir eru samkvæmt hæfnisdómi, sbr. 29. og 41. gr. sameiginlegra reglna nr. 569/2009 fyrir Háskóla Íslands. Akademískir starfsmenn skila árlega framtali um störf sín og byggir matið á efni þess. Ritverk og annað útgefið efni sem ekki er auðkennt Háskóla Íslands (e. University of Iceland) er ekki tekið til mats. Mat á störfum nær til rannsókna, kennslu, stjórnunar, þjónustu og fleiri þátta. Árlegt framtal starfa felur í sér skýrslu um rannsóknastörf undangengins árs, uppfærslu kennsluferilskrár, yfirlit um samstarf við aðila utan Háskólans og yfirlit um aukastörf utan Háskólans. Engin stig, hvorki fyrir rannsóknir, kennslu né annað, eru veitt fyrir en fullnægjandi framtali hefur verið skilað.

Rannsóknir

Mat á rannsóknum byggir í meginatriðum á birtingarvettvangi ritverks. Litið er svo á að efni sem birtist á vettvangi sem gerir strangar fræðilegar kröfur hafi þegar verið metið með tilliti til efnisöflunar, frumleika og framlags til nýrrar þekkingar. Þá skiptir sköpum hvernig útgefandi stendur að ritrýni. Ritrýni telst fullnægjandi þegar efni sem til stendur að birta er sent til a.m.k. tveggja ritrýna. Ritrýni skal vera nafnlaus, fagleg, efnisleg og unnin af viðurkenndum sérfræðingum á viðkomandi sviði. Enn fremur er lagt mat á dreifingu, aðgengi og áhrif ritverka.

Kennsla

Lagt er mat á virkni og gæði í kennslu, sem m.a. birtist í birtu kennsluefni, nýsköpun í kennslu og leiðbeiningu nemenda í framhaldsnámi. Uppfæra þarf kennsluferilskrá árlega í tengslum við mat á störfum. Kennslustig vegna kennslureynslu (B1) fást ekki nema kennsluferilskrá hafi verið uppfærð samhliða framtali starfa, sbr. að framan.

Stjórnun, þjónusta og annað

Mat er lagt á stjórnunarstörf, sbr. C-hluta matskerfis, og þjónustu, sbr. D-hluta kerfisins. Lagt er mat á tiltekin stjórnunarstörf sem einkum eru á vegum Háskólans í heild eða fræðasviða hans. Stjórnun á vegum deilda er að jafnaði ekki metin til stiga samkvæmt reglum þessum. Í D-hluta er lagt mat á ýmis störf er falla undir þjónustu og fræðslu fyrir almenning sem háskólaþólk sinnir í krafti sérþekkingar sinnar.

A - hluti Rannsóknir

a) Deiliregla vegna fjölhöfundaefnis

Deiliregla þessi tekur til bóka (A2), bókakafla (A3), tímaritsgreina (A4), ráðstefnurita (A5), fræðilegrar ritstjórnar (A7), skýrslna, ritdóma og þýðinga (A8), námsefnisgerðar (A9) og til nýsköpunar (A10). Þegar höfundar eru fleiri en einn reiknast stig á eftirfarandi hátt:

Tveir höfundar	1,5 x stig / 2
Þrír höfundar	1,8 x stig / 3
Fjórir höfundar eða fl.	2,0 x stig / fjölda höfunda

Til að draga úr skerðingu stiga vegna fjölhöfundaverka gildir eftirfarandi:

1. Af fyrstu fjórum fjölhöfundaritverkum hvers höfundar er valið eitt verk sem færir honum til viðbótar helming af mismuninum á milli veittra stiga og grunnstiga viðkomandi ritverks. Ávallt er valið það ritverk sem hagstæðast er fyrir viðkomandi.
2. Ef viðkomandi birtir fimm eða fleiri fjölhöfundaverk á árinu er aftur valið eitt ritverk sem gefur höfundi helming af mismuninum á milli veittra stiga og grunnstiga ritverks.

Dæmi:

Ef um er að ræða ritverk sem gefur 20 grunnstig með sex höfundum fást 13,3 stig ($2 \cdot 20 / 6 = 13,3$). Mismunurinn á veittum stigum (13,3) og grunnstigum (20) er 6,7 stig og samkvæmt deilireglunni fæst helmingur þeirra til viðbótar eða 3,4 stig. Ritverkið færir því höfundi 16,7 stig. Ef fjölhöfundaritverk viðkomandi höfundar eru fimm eða fleiri endurtekur reglan sig.

Skýring: Miðað er við óbreytta deilireglu frá núgildandi matskerfi en reynt er að koma á móts við sjónarmið um að auka vægi fjölhöfundaverka enn frekar. Það er gert með því meta eitt til tvö ritverk til fleiri stiga, sbr. framangreint. Tillaga vísindanefndar gerði ráð fyrir sérstakri umbun fyrir aðalhöfund fjölhöfundaverka. Athugasemdir komu frá nær öllum fræðasviðum um þá aðferðafræði. Bent var á að oft gæti reynst snúið eða jafnvel ómögulegt að ákvarða hver aðalhöfundurinn væri. Þá komu fram sjónarmið um að regla sem verðlaunar aðalhöfund sérstaklega gæti haft óæskileg áhrif á samskipti kennara og stúdenta.

b) Sérstakt mat

Kennarar og sérfræðingar geta óskað eftir því að verk sem falla undir liði A.2.-A.5, A7.2. verði metin sérstaklega og hefur matsnefnd háskólaráðs heimild til að víkja frá þeim matsramma sem um ritverkið gildir. Óski kennari eða sérfræðingur eftir því að vikið verði frá hámarksstigafjölda skal hann rökstyðja það sérstaklega. Leitað verður aðstoðar sérfróðra manna við sérstakt mat.

Skýring: Að mestu óbreytt frá núgildandi matsreglum, þó er opnað fyrir sérstakt mat á ritstjórn bóka.

c) Endurmat

Kennarar og sérfræðingar geta á fimm ára fresti óskað eftir endurmati á verkum sem hafa vakið sérstaka athygli eða hafa haft óvenju mikil áhrif á fræðasviði kennarans eða sérfræðingsins. Leitað verður til sérfróðra manna á viðkomandi fræðasviði til að aðstoða við matið. Við endurmat er auk hefðbundinna matsforsendna lögð sérstök áhersla á áhrif ritverks.

Skýring: Óbreytt frá núgildandi matsreglum.

Matsflokkar A1 til A12

A1 Lokaritgerðir

A1.1 Kandidats- eða meistararitgerð (15 stig)

A1.2 Doktorsritgerð (30 stig)

Koma þarf fram við hvaða háskóla prófritgerð er skrifuð og hvenær, svo og titill og blaðsíðufjöldi. Ef taldar eru fram tvær ritgerðir á sama stigi er gefið fyrir báðar. Ef birtar eru greinar, bók eða annað efni sem byggt er á doktorsritgerð er slík viðbótarbirting jafnframt metin til stiga í viðeigandi flokki.

Skýring: Öbreytt frá núgildandi matsreglum.

A2 Bækur

A2.1. Ritrynd útgáfa hjá virtustu vísindaförlögum heims (76-100 stig)

Bækur sem gefnar eru út hjá virtustu vísindaförlögum heims. Eftirfarandi förlög falla í þennan flokk:

Cambridge University Press,

Elsevier

Harvard University Press

John Wiley & Sons (þ.á m. Blackwell Publishing)

Kluwer/Springer

Oxford University Press

Taylor and Francis (þ.á m. Routledge)

[Ath. listinn enn í vinnslu.]

Framangreindur listi um virtustu vísindaförlög heims er ekki tæmandi. Höfundar ritverka sem gefin eru út hjá öðrum sambærilegum akademískum förlögum geta óskað eftir því að ritverk þeirra verði metið í þessum flokki, þetta á t.d. við um förlög sem eru mjög framarlega á tilteknum þröngum fræðasviðum.

A2.2. Alþjóðleg ritrynd útgáfa og innlend ritrynd útgáfa með alþjóðlega skírskotun (51-75 stig)

Innlend ritrynd ritverk teljast hafa alþjóðlega skírskotun ef þau uppfylla eftirfarandi skilyrði:

- 1) Verkin uppfylla kröfur um þekkingarsköpun í alþjóðlegri vísindaumræðu samtímans.
- 2) Útgefandinn tryggir aðgengileika verka erlendis (t.d. með umboðsaðilum), þannig að hægt sé að nálgast þau á alþjóðlegum bókakaupalistum.
- 3) Auk ritryni sinnir forlagið virkri fræðilegri ritstjórn.
- 4) Ef verkið er á íslensku skal fylgja því útdráttur á ensku (eða öðru útbreiddu tungumáli).

A2.3. Íslensk eða erlend ritrynd útgáfa sem einkum miðast við staðbundið fræðasamfélag (26-50 stig)

Hér er t.d. átt við ritrynd ritverk sem gefin eru út af viðurkenndum útgáfuaðilum en er einkum beint til staðbundins fræðasamfélags (e. „domestic academic community“) og uppfylla ekki öll þau skilyrði sem sett eru um flokk tvö. Gerð er skýlaus krafa um að verk í þessum flokki byggi á sjálfstæðum rannsóknum en gildi þeirra getur jafnframt falist í vissu

miðlunarhlutverki, þ.e. að þau beini alþjóðlegri vísindaumræðu og kenningum inn í staðbundið fræðasamfélag.

A2.4. Aðrar bækur (0-25 stig)

Í þennan flokk falla lítt ritrýnd vísindarit sem einkum er beint til staðbundins fræðasamfélags.

A2.5. Endurútgáfur (0-10 stig).

Endurútgáfur þurfa að fela í sér umtalsverðar breytingar.

Skýring: Byggt er á tillögu vísindanefndar, en hver flokkur bóka hefur verið skilgreindur nánar. Meginsjónarmiðin sem flokkunin byggir á eru hin sömu og hið svokallað ERIH flokkunarkerfi byggir á (sbr. A4 að neðan) Flokkur A2.5, Endurútgáfur, er óbreyttur frá núgildandi matsreglum. Mat á bókum er samkvæmt þessari tillögu hækkað úr að hámarki 60 stigum í 100 stig. Mjög miklar kröfur eru gerðar til bóka sem koma til álitu fyrir efsta flokkinn. Undanfarin ár hafa örfár bækur háskólamanna komið til álitu, t.d. hefði að öllum líkindum engin bók fallið í þennan flokk árið 2008.

A3. Bókakaflar

Bókakaflar eru metnir í fjórum flokkum og gilda sömu kröfur um þá og um flokka bóka (A2.1. til A2.4.) hér að framan.

A3.1. Ritrynd útgáfa hjá virtustu vísindaförslögum heims (20 stig).

A3.2. Alþjóðleg ritrynd útgáfa og innlend ritrynd útgáfa með alþjóðlega skírskotun (15 stig).

A3.3. Íslensk eða erlend ritrynd útgáfa sem einkum miðast við staðbundið fræðasamfélag (10 stig).

A3.4. Kaflar í öðrum bókum (0-5 stig).

Skýring: Byggt er á tillögu vísindanefndar.

A4 Tímaritsgreinar

A4.1 Grein birt í ISI-tímariti með háan áhrifastuðul og í tímariti sem raðast í A-flokk skv. ERIH (20 stig).

Svokölluð ISI-tímarit eru alþjóðleg vísindatímarit sem skráð eru í sérstaka gagnagrunna á vegum Thomson Scientific. Greinar í slíkum tímaritum með það háan áhrifastuðul (e. impact factor) að þau raðast í efstu 10% í sínum flokki fá 20 stig. Flokkunarkerfið ERIH byggir á jafningjamati og er á vegum European Science Foundation og kallast European Research Index for Humanities.

A4.2. Aðrar greinar í ISI tímaritum, greinar í B-flokki skv. ERIH eða greinar sem fá 1. einkunn í könnun fyrir tímarit (15 stig).

A4.3. Greinar tímaritum í C-flokki í ERIH og greinar sem fá 2. einkunn í könnun fyrir tímarit (10 stig).

A4.4 Greinar birtar í tímaritum sem fá 3. einkunn í könnun fyrir tímarit (5 stig).

Skýring: Hér er lögð áhersla á að umbuna mest fyrir það sem best er gert á hverju fræðasviði Háskóla Íslands fyrir sig. Með því að byggja á hinu nýja flokkunarkerfi ERIH næst það markmið mun betur en með núgildandi matskerfi. ERIH tekur til um 6.000 tímarita á sviði hugvísinda, félagsvísinda og menntavísinda. Tímaritin eru flokkuð í þrjá flokka en í A-flokki eru ritrýnd tímarit með mikla útbreiðslu og alþjóðlega skírskotun, en í C flokk falla ritrýnd tímarit sem fyrst og fremst hafa staðbundna skírskotun. Ekkert íslenskt tímarit er í A-flokki, fimm eru í B-flokki og í C-flokk falla 14 íslensk tímarit. Auk þessa er gerð sérstök könnun á ritstjórn og ritrýniháttum

þeirra íslensku tímarita sem ekki er að finna í ERIH-flokkunarkerfinu. Í viðauka má sjá þær forsendur sem könnunin byggir á og hvernig tímarit eru flokkuð á grundvelli niðurstöðunnar.

A5 Greinar í ráðstefnuritum

Alþjóðleg vísindaráðstefna þarf að uppfylla eftirtalin skilyrði:

1. Opinber dagskrá.
2. Þátttakendur valdir á grundvelli sérfræðipækkingar sinnar.
3. Að minnsta kosti 15 fyrirlesarar taka þátt.
4. Að minnsta kosti 5 þeirra starfi erlendis.

Útdrættir og lengdir útdrættir eru ekki metnir til stiga.

A5.1 Grein birt í ráðstefnuriti í úrvalsflokki (10 stig)

Ritryndar greinar í ráðstefnuritum sem eru viðurkennt birtingarform á viðkomandi fræðasviði. Slík ráðstefnurit skulu vera aðgengileg í alþjóðlegum gagnagrunnum. Dæmi um þess háttar gagnagrunna eru:

IEEE Xplore: <http://ieeexplore.ieee.org>

MSME digital store: <http://store.asme.org/>

SPIE: <http://spie.org>

ASCE: <http://www.asce.org>

ACM Digital Library: <http://portal.acm.org>

Listinn er ekki tæmandi. Matsnefndir meta þau tilvik sem upp koma hverju sinni.

A5.2 Grein í öðru ráðstefnuriti (3-5 stig)

Hér er átt við ritrynd ráðstefnurit. Við ákvörðum um stigamat er litið til vinnubragða við ritryni.

Skýring: Felur ekki í sér miklar breytingar frá núgildandi matskerfi. Hvor ráðstefnuritaflokkur er þó betur skilgreindur en áður.

A6 Fyrirlestrar og veggspjöld

A6.1 Plenum-fyrirlestur eða inngangsfyrirlestur á alþjóðlegri vísindaráðstefnu (5 stig).

A6.2 Opinber boðsfyrirlestur við erlendan háskóla (3 stig).

A6.3 Erindi á alþjóðlegri ráðstefnu (3 stig).

A6.4 Erindi á innlendri ráðstefnu (2 stig).

A6.5 Erindi á fræðilegu málþingi, málstofu eða fundi fyrir faghópa (1 stig).

A6.6 Veggspjald á alþjóðlegri ráðstefnu (2 stig).

A6.7 Veggspjald á innlendri ráðstefnu (1 stig).

Dagskrá ráðstefnu eða fundar þarf að liggja fyrir. Boðsbréf þarf að fylgja framtali þegar um er að ræða plenum-fyrirlestur eða inngangsfyrirlestur (A6.1) og opinberan boðsfyrirlestur við erlendan háskóla (A6.2). Plenum-fyrirlestur á mjög stórrí ráðstefnu (fleiri en 1.000 þátttakendur) má meta til 10 stiga. Stig fyrir erindi og veggspjöld eru veitt þeim sem flytur. Þó fá kennarar og sérfræðingar stig ef erindi/veggspjald er flutt/kynnt af stúdent þeirra og er stigafjöldi þá reiknaður samkvæmt almenntri deilireglu og miðað við að höfundar séu tveir.

Þegar kennari eða sérfræðingur er með óvenju mörg framlög (veggspjald og/eða erindi) á sömu ráðstefnu eða á einu ári er heimilt að setja þak á stigamat ef ástæða þykir til.

Skýring: Þessi flokkur hefur verið skilgreindur betur og lagaður að venjum við mat á erindum og veggspjöldum.

A7 Fræðileg ritstjórn

Með fræðilegri ritstjórn er átt við að ritstjórnarvinnan byggir á sérfræðipökkingu ritstjórans. Ekki er því um að ræða ritstjórn sem lýtur fyrst og fremst að frágangi texta.

A7.1 Ritstjóri vísindatímarits (3-6 stig/hefti)

Einungis er átt við fræðilega ritstjórn ritrýndra tímarita. Veitt eru þrjú stig fyrir ritstjórnarvinnu sem einkum felur í sér ákvörðun um birtingu efnis. Ef ritstjórn lýtur einnig að inntaki og efnistöfum einstakra greina, gagnrýni og fræðilegum athugasemdum, eru veitt þrjú stig til viðbótar. Sinni sami maður hvoru tveggja er því heimilt að veita honum 6 stig fyrir hvert hefti.

Veitt eru stig fyrir að hámarki þrjú hefti á ári ef tímaritið fellur í flokk A4.1 og A4.2. Falli tímaritið í flokk A4.3 er einungis heimilt að veita stig fyrir tvö hefti á ári og falli tímaritið í flokk A4.4 er hámarkið eitt hefti á ári.

A7.2 Ritstjóri bókar (5-20 stig)

Hér er einungis átt við ritstjórn ritrýndra bóka. Gert er ráð fyrir því að fræðilegur ritstjóri bókar hafi í senn ákvörðunarvald um birt efni og sinni ritstjórn einstakra bókarkafla. Mat á ritstjórn fer enn fremur eftir umfangi bókar og flokkun hennar skv. A2.

Unnt er að óska eftir sérstöku mati fyrir verulega umfangmikla ritstjórn, t.d. þegar um er að ræða stór safnrit með efni eftir fjölda fræðimanna, t.d. í bókum sem taka yfirgripsmikil svið fræðanna til endurskoðunar og ritstjóri hefur átt virkan þátt í slíkri kortlagningu, þ.e. með skipulagi ritsins, inngangi að einstökum bókarhlutum o.s.frv.

Skýring: Meginbreytingin sem mat á ritstjórn felur í sér frá núgildandi reglum er annars vegar nákvæmari skilgreining á því hvað fræðileg ritstjórn felur í sér og hins vegar er mat á ritstjórn sett í samhengi við flokkun bóka, bókakafla og tímarita, sbr. flokka A2, A3 og A4.

A8 Skýrslur, ritdómar og þýðingar

A8.1 Skýrslur (0-3 stig)

Forsendur mats eru umfang efnisöflunar, frumleiki og framlag til nýrrar þekkingar. Hér er átt við útgefna fræðilegar skýrslur, „working papers“, útgáfuraðir háskóla með útgáfunúmeri, skýrslur í prentskilum, t.d. með ISBN-númeri.

Skýrslur geta einnig verið metnar til þjónustustiga undir lið D4. Skýrslur sem eru afurð þjónusturannsókna falla að jafnaði undir flokk D. Mat á skýrslum miðast almennt við það að efni þeirra geti, ef tilefni er til, birst á vettvangi sem gerir strangar fræðilegar kröfur.

Skýring: Byggt er á tillögu vísindanefndar. Í núverandi kerfi er unnt að meta skýrslur til 5 stiga og felur þessi tillaga því í sér lækkun. Í reynd hafa flestar skýrslur hingað til verið metnar til tveggja stiga. Tillagan felur enn fremur í sér að skýrslur sem birtar eru í tengslum við þjónusturannsóknir verði að jafnaði metnar til þjónustustiga. Vakin er athygli á því að mat á skýrslum tekur mið af því að efni þeirra geti síðar verið metið til fleiri rannsóknastiga ef það er birt á viðeigandi vettvangi.

A8.2 Ritdómar (1-3 stig)

Hér er átt við ritdóm í ritrýndu tímariti þar sem allt birt efni lýtur jafnframt fræðilegri ritstjórn. Með ritdómi er átt við fræðilega umfjöllun og gagnrýni, ekki stuttar efnislegar umsagnir um einstakar bækur eða rit.

A8.3 Þýðingar á greinum, bókarköflum og öðrum stuttum ritverkum (0-5 stig)

A8.4 Þýðingar á bókum (10-25 stig)

Hér er um að ræða þýðingar sem hafa verulegt fræðilegt gildi og teljast vera á fræðasviði hlutaðeigandi.

Endurútgáfur verka á öðrum tungumálum eru metnar til allt að 10 stiga. Átt er við þýðingar fræðirita háskólafélks sem gefnar eru út á alþjóðlegum vettvangi. Feli slík útgáfa í sér mikla fræðilega viðurkenningu er heimilt að meta verkið til fleiri stiga í samræmi við ákvæði um sérstakt mat í reglum þessum.

Skýring: Samkvæmt þessu er unnt að fá allt að 25 stig fyrir viðameiri fræðilegar þýðingar en núgildandi matsreglur gera ráð fyrir 10 stiga hámarki. Í raun voru viðameiri þýðingar áður metnar sem bækur því er að vissu leyti verið að laga matsreglurnar að venjubundnum vinnubrögðum.

A9 Námsefnisgerð fyrir leik-, grunn- og framhaldsskóla

A9.1 Námsefnisgerð (0-10 stig)

Heimilt er að meta námsefni fyrir grunn- og framhaldsskóla til stiga ef það uppfyllir eftirtalin skilyrði:

1. Inntak námsganga er á rannsóknasviði höfundar.
2. Námsgögn bera með sér að frumrannsókn hafi farið fram.
3. Námsgögnin eru ritrýnd af sérfræðingum og gefin út af virtum útgefanda.
4. Markmið, aðferðir og ferli námsefnisgerðarinnar kemur fram í gögnum hennar, t.d. í kennsluleiðbeiningum eða í greinargerð sem höfundur lætur fylgja.
5. Magn námsefnisins er umtalsvert.

Séu þessi skilyrði ekki uppfyllt er námsefni metið til þjónustustiga.

Skýring: Námsefnisgerð er nýr flokkur í matskefi Háskólans en allläng hefð var fyrir því að slíkt efni væri metið til rannsóknastiga í Kennaraháskóla Íslands. Þegar magn námsefnis er metið, sbr. 5. tl. þarf að hafa í huga að það getur verið umfangslítið fyrir yngstu nemendurna. Gert er ráð fyrir því námsefni sem sent er inn til mats skv. A9 verði, a.m.k. fyrst um sinn, metið af sérfræðingum í námsefnisgerð en ekki hefðbundnum matsnefndum vegna vinnumats.

A10 Nýsköpun og yfirfærsla þekkingar

Við mat á nýsköpun og þekkingaryfirfærslu er gerð rík krafa um tengsl við rannsóknir, frumleika og nýsköpun þekkingar. Mat í þessum flokki tekur einnig til listsköpunar í akademísku samhengi. Nýsköpun og þekkingaryfirfærslu er einnig heimilt að meta til þjónustustiga.

A10.1 Sprotafyrirtæki, hönnun, nýsköpun og þekkingaryfirfærsla (0-20 stig)

Mat byggist á hefðbundnum matsforsendum, sbr. inngangskafli reglna þessara. Þekkingaryfirfærsla er metin til stiga þegar stofnun fyrirtækis eða gerð samnings felur í sér birtingu nýrrar þekkingar eða nýsköpun í vísindum. Enn fremur er lítið til þeirra áhrifa sem

starf fyrirtækis hefur haft á starfsemi Háskólans og tengsla þess við skólann. Að jafnaði eru sprotafyrirtæki því ekki metin fyrir en að 5 árum liðnum og skal greinargerð fylgja framtali.

A10.2 Hugbúnaður (0-20 stig).

Aðeins er metinn til stiga hugbúnaður sem felur í sér þekkingarsköpun og/eða nýjar lausnir í hugbúnaðargerð. Birtingarformið er hugbúnaður með dreifingu sem söluvara eða í opnum aðgangi (e. open source).

A10.3 Sálfræðipróf (0-5 stig).

Aðeins eru metin til stiga próf sem eru útgefin og aðgengileg og fela í sér rannsóknavinnu sem ekki birtist á öðru formi.

A10.4 Lagafrumvörp (að jafnaði 2 stig).

Aðeins eru metin til stiga lagafrumvörp sem fela í sér frumrannsóknir og rannsóknavinnu sem ekki hefur birst á öðru formi. Heimilt er að meta vinnu við lagafrumvörp sem ekki uppfylla framangreint skilyrði til þjónustustiga. Í sumum tilvikum felur gerð lagafrumvarpa í sér umtalsverða rannsóknavinnu. Undir slíkum kringumstæðum er heimilt að meta þau til allt að 10 stiga. Höfundur þarf að óska sérstaklega eftir slíku mati með rökstuðningi.

Mat á lagafrumvörpum miðast almennt við það að efni þeirra geti, ef tilefni er til, birst á vettvangi sem gerir strangar fræðilegar kröfur. Þegar ekki kemur fram í lagafrumvarpi hver eða hverjir höfundar þess eru þarf staðfesting á því að fylgja framtali.

Skýring: Hér um nýjung að ræða. Heimild til að meta umtalsverða rannsóknavinnu í tengslum við gerð lagafrumvarpa til allt að 10 stiga er ekki að finna í núverandi matsreglum.

A10.5 Einkaleyfi (10-15 stig)

Aðeins birt einkaleyfi eru metin til stiga. Þegar einkaleyfaumsókn er birt fást 10 stig og 5 viðbótarstig ef einkaleyfið er veitt. Ekki eru veitt stig fyrir endurbirt einkaleyfi eða einkaleyfaumsóknir.

Skýring: Í samræmi við stefnu Háskólans er stigagjöf aukin fyrir einkaleyfi. Í núverandi matsreglum eru einkaleyfi metin til 10 stiga.

A10.6 Þróunarstarf í skólum og öðrum stofnunum (0-10 stig)

Átt er við þróunarstarf í skólum sem byggist á rannsóknum hlutaðeigandi fræðimanns. Um er að ræða þróunarverkefni sem fela í sér yfirfærslu nýrrar þekkingar á vettvangi skólastarfs. Þróunarverkefni eru metin að þeim loknum. Fyrir þarf að liggja skilgreining á verkefninu og áætlun um framkvæmd þess. Gera þarf grein fyrir því hvernig þróunarverkefnið tengist rannsóknum hlutaðeigandi fræðimanns. Við mat á þróunarverkefni er auk framangreinds litið til þess hve viðtækt verkefnið er og hvort jafningjamat hafi farið fram. Uppfylli þróunarverkefni ekki framangreind skilyrði er heimilt að meta það til þjónustustiga

Heimilt er að meta sambærilega þekkingaryfirfærslu innan annarra stofnana, sem uppfyllir viðlíka skilyrði og að framan greinir, til stiga í þessum flokki.

Skýring: Þróunarstarf í skólum er nýr matsflokkur í matsreglum Háskólans en hefð var fyrir mati á slíkum verkum í Kennaraháskóla Íslands.

A10.7 Nýsköpun í listum (0-40 stig)

Stig fyrir listsköpun eru háð því að kennari sinni fastri kennslu sem lýtur sérstaklega að listsköpun og listaverkum (þ.m.t. bókmenntaverkum). Kennarar eru ekki bundnir einstökum listgreinum í þessu tilliti (þannig getur t.d. kennari í myndlist fengið stig fyrir leikverk eða tónleikahald).

A10.7.1 Stór einkasýning í viðurkenndu listasafni samþykkt af listráði (10-30 stig)

Með stórrri einkasýningu í viðurkenndu listasafni, samþykkt af listráði, er átt við einkasýningu á mynd- og hönnunarverkum t.d. í: Listasafni Íslands, Listasafni Reykjavíkur, Listasafni Kópavogs, Listasafni ASÍ, Hafnarborg, menningar- og listastofnun Hafnafjarðar, Nýlistasafninu, Norræna húsinu í Reykjavík, Listasafni Akureyrar eða öðrum viðurkenndum listasöfnum.

A10.7.2 Einkasýning eða þátttaka í samsýningu í viðurkenndu listasafni eða á alþjóðlegum lista- og menningarhátíðum (0-15 stig)

Með einkasýningu er hér átt við einkasýningu á frumsýndum verkum. Viðurkennd listasöfn eru þau sömu og áður voru talin.

A10.7.3 Viðamikil frumsamin tónsmíð eða leikverk sem flutt er opinberlega af viðurkenndum listamönnum (10-30 stig)

Með viðamikilli tónsmíð er t.d. átt við óperu- eða hljómsveitarverk sem flutt er í opinberu tónleikahúsi s.s. Íslensku Óperunni, Þjóðleikhúsinu, Salnum (Tónlistarhúsi Kópavogs) eða Háskólabíói. Gert er ráð fyrir að tónverkið fylli heila efnisskrá í lengd.

A10.7.4 Frumsamin tónsmíð eða leikverk sem flutt er opinberlega af viðurkenndum listamönnum (0-10 stig)

Með tónsmíð er átt við minni tónsmíðar sem fluttar eru af viðurkenndum listamönnum. Ekki er unnt að gefa stig fyrir tiltekið tónverk oftast en einu sinni.

A10.7.5 Tónlistarflutningur/leiktúlkun á alþjóðlegum lista- og menningarhátíðum, á opinberum áskriftartónleikum eða í viðurkenndu leikhúsi (0-15 stig)

Með tónlistarflutningi á alþjóðlegum lista- og menningarhátíðum eða á opinberum áskriftartónleikum er t.d. átt við Alþjóðlegu raf- og tölvutónlistarhátíðina, Norræna músíkdaga og aðrar erlendar hátíðir. Opinberir áskriftartónleikar eru t.d. áskriftartónleikar Sinfóníuhljómsveitar Íslands og áskriftartónleikar Tíbrár í Salnum Kópavogi.

A10.7.6 Tónleikahald eða viðamikil leiktúlkun (0-10 stig)

Með tónleikahaldi er átt við einleik, einsöng eða listræna stjórnun á tónleikum á vegum virtra tónleikahaldara eða menningarstofnana. Með listrænni stjórnun er átt við stjórnun hljómsveitar, kórs eða kammerhóps.

Tónleikahald í tengslum við eða á vegum alþjóðlegra lista- eða menningarhátíða, virtra tónleikahaldara, eða virtra menningarstofnana felur að jafnaði í sér meiri viðukenningu en tónleikahald á eigin vegum. Að jafnaði eru veitt fleiri stig fyrir tónleikahald ef um frumflutning tónverks er að ræða.

Veita má hljóðfæraleikara stig fyrir samleik í kammerhóp eða veigamikil hlutverk í tónflutningi með viðurkenndum aðilum, s.s. Sinfóníuhljómsveit Íslands, þó ekki sé um

einleik að ræða, enda hafi verið sóst eftir hljóðfæraleikaranum á grundvelli listrænnar hæfni hans. Ekki er gert ráð fyrir að slíkar uppákomur veiti stig nema þær séu a.m.k. fleiri en tvær yfir árið.

Virtir tónleikahaldarar og menningarstofnanir eru t.d.: Sinfóníuhljómsveit Íslands, Salurinn: Tónlistarhús í Kópavogi, Íslenska Óperan, Sumartónleikar í Skálholti, Listahátíð í Reykjavík, Myrkir músíkdagar, Kammersveit Reykjavíkur, Caput, Musica Antiqua, Gerðuberg, Háskólatónleikar, Félag Íslenskra Tónlistarmanna og Tónlist fyrir alla.

A10.7.7 Útgefnar hljóðritanir (0-10 stig)

Útgefnar hljóðritanir eru hljóðritanir sem sendar eru út af viðurkenndum fjölmiðlum eða gefnar eru út af viðurkenndum útgáfuaðilum. Hljóðritun og útsending að frumkvæði virts fjölmiðils, s.s. RÚV. Viðurkenndir tónlistarútgefendur eru t.d.: FÍH, Geimsteinn, Ísdiskar, Íslensk Tónverkamiðstöð, Jazzís, Klassís, Smekkleysa, Skífan, Stöðin ehf., Thule Musik, Tónaflóð eða þekktir erlendir tónlistarútgefendur.

A10.7.8 Bókmenntatextar. (0-10 stig)

Hér er átt við ljóð, smásögur, stutt leikrit og aðra stutta bókmenntatexta.

A10.7.9 Bókarverk. (10-40 stig)

Átt er við skáldsögur, ljóðasöfn, smásagnasöfn, viðamikil leikrit og önnur bókarverk er búa yfir listrænu gildi. Tekið er tillit til fyrri birtinga einstakra hluta verkanna sem og þess hvort leikrit hefur áður verið metið til stiga vegna sviðsetningar.

A10.7.10 Þýðingar á bókarköflum og öðrum stuttum ritverkum sem hafa listrænt gildi (0-5)

A10.7.11 Þýðingar á bókum sem hafa listrænt gildi (10-25)

A10.7.12 Hönnunarverk, sýningarstjórn eða leikstjórn. (0-10 stig)

Átt er við verkhönnun í listrænu augnamiði, skipulagningu og stjórnun sýningar fyrir listasafn eða leikhús.

Með hönnunarverkum er átt við verk sem hannað er fyrir sérstakar þarfir og aðstæður þar sem tekið er tillit til fleiri þátta svo sem umhverfis, notagildis, og fegurðar.

Einstök mynd- og hönnunarverk eru ekki metin til stiga nema þar sem verk er hannað fyrir tiltekna aðstæður þar sem fram komi viðurkenning fleiri aðila svo sem listráðs eða valnefndar á sérþekkingu viðkomandi til að vinna verkið.

Skýring: Nýsköpun í listum er nýr matsflokkur í matsreglum Háskólans en hefð var fyrir mati á slíkum verkum í Kennaraháskóla Íslands.

A11 Tilvitnanir

Tilvitnanir sem skráðar eru í ISI-gagnagrunnum eru metnar til stiga á eftirfarandi hátt:

Fyrstu 10 tilvitnanir: 1 stig/tilv.

Næstu 20 tilvitnanir: 0,5 stig/tilv.

Tilvitnanir umfram 30: 0,1 stig/tilv.

Tilvitnanir umfram 2.000: 0,05 stig/tilv.

Hægt er að óska eftir að tilvitnanir í ritrýndum bókum og tímaritum sem ekki eru skráð í ISI-gagnagrunna verði metnar til stiga. Hlutaðeigandi fræðimaður þarf að leggja fram staðfestingu á að vitnað hafi verið til verka hans í slíkum ritum.

Stig vegna tilvitnana koma ekki til greiðslu úr Vinnumatssjóði eða Ritlauna- og rannsóknasjóði.

Skýring: Stigagjöf fyrir tilvitnanir er nánast óbreytt en ákvæðið er víkkað út, þannig að það tekur einnig til tilvitnana í ritrýndum ritverkum sem eru utan ISI-gagnagrunnanna.

A12 Styrkir úr samkeppnissjóðum (0-20 stig/ári)

Miðað er við árlega heildarupphæð styrkja úr rannsóknasjóðum utan Háskóla Íslands. Aðeins eru metnir styrkir sem bókfærðir eru í bókhaldskerfi Háskólans eða tengdra stofnana. Verkefnisstjóri/ábyrgðarmaður umsóknar fær stigin nema ef samkomulag styrkþega kveður á um annað. Komi styrkur úr alþjóðlegum samkeppnissjóði tvöfaldast stigagjöf miðað við neðangreint, en hámarkið er óbreytt, þ.e. 20 stig.

Stigagjöf:

1 stig fyrir 0,5 - 1,999 milljónir/ári

2 stig fyrir 2 - 3,999 milljónir/ári

3 stig fyrir 4 - 6,999 milljónir/ári

4 stig fyrir 7 - 9,999 milljónir/ári

Síðan er gefið eitt stig fyrir hverjar 10 milljónir/ár en að hámarki 20 stig/ári.

Stig vegna styrkja koma ekki til greiðslu úr Vinnumatssjóði eða Ritlauna- og rannsóknasjóði.

Viðauki um flokkun íslenskra tímarita

Við mat á íslenskum tímaritum er lögð áhersla á að vinnubrögð tímaritanna séu í samræmi við það sem gerist á alþjóðavettvangi. Í því skyni er tekið mið af þeim skilyrðum sem notuð eru á vegum *Thomson Scientific* fyrir skráningu á alþjóðlegum vísindatímaritum í sérstaka gagnagrunna. Skilyrðin taka m.a. til ritrýni, hvort útdráttur á ensku fylgir, útgáfutíðni og útbreiðslu tímarits svo og höfnunarhlutfalls greina. Þessum skilyrðum, sem eru alls 19 að tölu, er skipt í ófrávíkjanleg og æskileg skilyrði.

Þrjú stigaflokkar íslenskra tímarita:

- Gefin eru 15 stig fyrir greinar í afburða tímaritum sem uppfylla 17 fyrst tölðu skilyrðin (sjá að neðan).
- Gefin eru 10 stig fyrir greinar í tímaritum sem uppfylla 15 fyrst tölðu skilyrðin.
- Gefin eru 5 stig fyrir greinar í tímaritum sem uppfylla a.m.k. fjögur ófrávíkjanleg skilyrði (sbr. að neðan).

Ófrávíkjanleg skilyrði:

1. Birting á áður óbirtum niðurstöðum.
2. Ritstjóri og ritstjórn með framhaldsmenntun á fræðasviðinu.
3. Grein tekin til forskoðunar hjá ritstjóra eða fræðilegri ritstjórn – samþykkt/hafnað.
4. Reglur um ritrýni. Aðsendar greinar aldrei birtar án nafnlausrar ritrýni frá tveimur eða fleiri sérfræðingum á viðkomandi sviði.
5. Athugasemdir frá ritrýnum er efnisleg.
6. Ritryndar greinar merktar sérstaklega þar sem óritrynt efni er einnig birt.
7. Höfnunarhlutfall skal nema a.m.k. 15% greina: Að jafnaði skal miða við s.l. þrjú ár.
8. Regluleg og áætluð útgáfutíðni tímarits. Að jafnaði er miðað er við 5 ár.
9. Útdráttur á íslensku.
10. Útdráttur á ensku.
11. Lýsandi heiti tímarits.
12. Lýsandi heiti greina.
13. Fullnægjandi bókfræðilegar upplýsingar allra tilvitnana.
14. Fullnægjandi merking vegna aðseturs höfunda greina.
15. Hlutfall höfunda ritryndra greina sem eru utan Háskóla Íslands skal nema a.m.k. 10%.

Æskileg skilyrði:

16. Innlendar áskriftir.
17. Erlendar áskriftir eða aðgengilegt á vefnum
18. Skráning í alþjóðlega gagnagrunna.

Ófrávíkjanleg skilyrði:

1. Birting á áður óbirtum niðurstöðum.
2. Ritstjóri og ritstjórn með framhaldsmenntun á fræðasviðinu.
5. Athugasemdir frá ritstjóra, ritstjórn er efnisleg.
6. Ritryndar greinar merktar sérstaklega þar sem óritrynt efni er einnig birt.

B. Kennsla

B1. Kennslureynsla

<i>B1.1. Aðjunkt, lektor, dósent eða prófessor, fullt starf</i>	10 stig/ári
<i>B1.2. Stundakennari sem hefur umsjón með námskeiðum</i> 2 stig/ári fyrir hvert námskeið, þó ekki meira en 6 stig/ári	2 stig/ári
<i>B1.3. Kennslutækninámskeið</i>	0-2 stig

Kennsla í akademískum skiptiáætlunum er metin eins og stundakennsla.

B2. Kennslurit

<i>B2.1. Smárit eða kennsluefni á vefnum</i>	0-3 stig
<i>B2.2. Kennslurit, kennslubækur</i>	5-60 stig

Heimilt er að meta bráðabrigðarútgáfur kennslurita samkvæmt lið 2.1., en þau eru metin samkvæmt 2.2. þegar þau koma út í endanlegri útgáfu.

B3. Leiðbeining stúdenta og andmæli

<i>B3.1. Við meistaraverkefni</i>	2-4 stig
<i>B3.2. Við doktorsverkefni</i>	10 stig
<i>B3.3. Seta í doktorsnefnd</i>	3 stig
<i>B3.4. Andmælandi við doktorsvörn</i>	3 stig

Stig eru veitt fyrir leiðbeiningu nemenda í framhaldsnámi þegar verkefnunum er lokið. Nöfn á framhaldsnemum og verkefnum þurfa að koma fram. Fjöldi stiga fyrir meistaraverkefni fer eftir umfangi þeirra. Leiðbeining við verkefni sem er minna en 50 ECTS-einingar gefur 2 stig, 50-70 ECTS-eininga verkefni gefur 3 stig og leiðbeining við verkefni sem er meira en 70 ECTS-einingar gefur 4 stig.

4. Nýsköpun í kennslu

2-10 stig

Unnt er að sækja um að fá metna vinnu við nýsköpun í kennslu og kennsluháttum, svo sem skipulagningu og skilgreiningu nýrra námsleiða, endurskipulagningu námskeiða, skilgreiningu nýrra námskeiða, þróun kennsluaðferða, gerð verkefnabanka og fleira. Skýrsla um nýsköpunarstarfið fylgi umsókn um mat samkvæmt þessum lið.

C. Stjórnun

Veitt eru stig fyrir stjórnun í samræmi við neðangreint. Umfang (velta, fjöldi starfsmanna, nemenda o.fl.) ræður stigamati í liðum C1, C4, C5.

<i>C1. Formaður námsbrautar</i>	5-10 stig/ári
<i>C2. Formaður í starfsnefnd háskólaráðs og fastadómnefnd fræðasviðs</i>	10 stig/ári
<i>C3. Formaður í helstu starfnefndum fræðasviða</i>	5 stig/ári
<i>C4. Forstöðumaður rannsóknarstofnunar</i>	5-15 stig/ári
<i>C5. Deildarforseti</i>	25-50 stig/ári
<i>C6. Fræðasviðsforseti</i>	75 stig/ári
<i>C7. Rektor</i>	100 stig/ári
<i>C8. Aðstoðarrektor</i>	50 stig/ári
<i>C9. Seta í háskólaráði</i>	5 stig/ári
<i>C10. Seta í nefnd á vegum háskólaráðs eða rektors</i>	2 stig/ári
<i>C11. Formaður í nefnd á vegum háskólaráðs eða rektors</i>	3 stig/ári
<i>C12. Seta í dómnefnd um störf við háskóla</i>	2 stig

Starfinu verður að vera lokið til þess að það sé metið til stiga.

Skýring: Mat á stjórnun hefur verið aðlagð að nýju skipulagi Háskólans.

D. Þjónusta

D1. Skipulagning alþjóðlegrar vísindaráðstefnu (2-10 stig)
Formennska/seta í ráðstefnunefnd.

D2. Opinber matsstörf (0-2 stig)
Seta í opinberum matsnefndum, tímabundið afmarkað verkefni.

D3. Seta í nefndum eða stjórnnum (0-2 stig)
Utan Háskóla Íslands.

D4. Álitsgerðir og skýrslur (0-5 stig)
Skýrslur gefnar út án formlegrar ritrýni eða óútgefnar skýrslur og álitsgerðir sem birtast á vegum eða fyrir aðila utan Háskóla Íslands. Skýrsla verður vera aðgengileg matsnefnd til þess að vera metin til stiga.

D5. Hugbúnaður (0-10 stig)
Hugbúnaðurinn þarf að fela í sér hagnýta hugbúnaðargerð og hafa dreifingu innanlands eða erlendis annað hvort sem söluvara eða í opnum aðgangi (e. *open source*).

D6. Fræðsluefni fyrir almenning (0-20)
Í öllum tilvikum verður að vera um að ræða ritun og/eða miðlun efnis sem hlutaðeigandi háskólamañn taka að sér vegna fræðilegrar sérþekkingar sinnar.

1. Bækur almenns eðlis	0-20 stig
2. Þýðingar almenns eðlis	0-10 stig
3. Ritstjórn bóka og tímarita almenns eðlis	0-6 stig
4. Grein í tímariti almenns eðlis.	0-5 stig
5. Ritdómur eða listdómur i fjölmiðli. (hámark: 10 stig/ári)	1 stig
6. Grein í dagblaði (0-3 stig) eða samning þáttar í öðrum fjölmiðli (hámark: 10 stig/ári)	0-10 stig
7. Erindi á málstofu eða málþingi ætluðu almenningi	1 stig
8. Upplýsingamiðlun og álitsgjöf. (hámark: 10 stig/ári)	0-10 stig

D7. Sprotafyrirtæki (0-50 stig)
Metin eru sprotafyrirtæki og leyfissamningar við aðila utan Háskóla Íslands. Þegar nokkur reynsla er komin á starfseminna, t.d. að 5-10 árum liðnum, er heimilt að endurmeta sprotafyrirtækið eða leyfissamninginn til allt að 50 þjónustustiga til viðbótar. Við matið er litið til þátttöku starfsmanna og nemenda, eignarhalds og sýnileika Háskóla Íslands í tengslum við verkefnið.

D8. Styrkir frá öðrum en samkeppnissjóðum (0-20 stig)
Heildarupphæð styrkja frá aðilum utan Háskóla Íslands. Aðeins eru metnir styrkir sem fara í gegnum bókhaldskerfi Háskólans, eða tengdra stofnana. Verkefnisstjóri/ábyrgðarmaður umsóknar fær einn stig nema ef samkomulag er um annað.

Stigagjöf:

1 stig fyrir 0,5-1,999 milljón/ári

2 stig fyrir 2-3,999 milljónir/ári

3 stig fyrir 4-6,999 milljónir/ári

4 stig fyrir 7-9,999 milljónir/ári

Gefið er eitt stig fyrir hverjar 10 milljónir/ári en að hámarki 20 stig/ári.

E. Fyrri störf (vegna grunnmats)

Metin er starfsreynsla í fyrri störfum sem falla utan þeirra starfa sem áður eru talin, enda sé hún á fræðasviði kennarans eða sérfræðingsins og nýtist í því starfi.

Starfsreynsla: 10 stig/ári

Höfð er hliðsjón af starfsreynslustigum nýráðinna kennara og sérfræðinga við frumröðun þeirra í launaflokk. Stig vegna fyrri starfa að viðbættum stigum vegna kennslu geta ekki orðið fleiri en 10 á ári.

F. Almenn

Í samræmi við þau 10 stig sem kennarar með 40% rannsóknaskyldu fá á ári fyrir kennslureynslu (sbr. lið B1) skulu sérfræðingar, fræðimenn og vísindamenn með 40% rannsóknarskyldu fá 10 stig á ári fyrir starfsreynslu. Sérfræðingar, fræðimenn og vísindamenn með 60% rannsóknarskyldu fá 7 stig á ári en sérfræðingar, fræðimenn og vísindamenn með 80% rannsóknarskyldu fá 3 stig á ári. Þessi stig að viðbættum stigum sérfræðinga, fræðimanna og vísindamanna vegna kennslu í yfirvinnu skulu þó ekki verða fleiri en 10 á ári.

Matsnefnd er heimilt að veita stig fyrir verkefni sem ekki rúmast innan ramma þessara reglna enda liggi fyrir um það rökstudd beiðni eða tillaga. Einkum er hér átt við vinnu innan eða utan háskóla í þágu vísindasamfélagsins í viðum skilningi og umfangsmikla kynningu eða fræðslu fyrir almenning.

Hægt er að víkja frá reglum þessum ef sérstaklega stendur á.